

四庫全書

集部

欽定四庫全書

文山集卷四

宋 文天祥 撰

內制

擬進御筆為馬丞相趙僉書上奏留平章

書曰三人占則從二人之言蓋占取其同自二人之同
推之卿士庶民無往不同者師相欲去二府以為不可
去是千萬人皆以為不可去矣朕自師相有請寢食不

為安朕必不能違衆心師相亦必不忍違朕心嗚呼尚
鑒時忱永綏在位師相其聽之哉所請宜不允

又擬

周公相成王終身未嘗歸國孟子當齊世不合故致為
臣蓋常情以去就為輕惟大臣以安危為重苟利諸國
皇恤其身若時元勲為我師相先帝付託大義所存太
母留行前言可覆胡為以疾而欲告休惟醫藥所以輔
精神惟安身所以保家國古者之賜几杖雖當七十而

不得引年我朝之重辯章雖過九旬而尚使為政勉釐重務勿因眇懷所請宜不允

此先生直翰林院時代言一二也留平章二批已進呈御前賈似道有聞嫌所擬無過褒之辭且怒不先呈己諷諭別直院官改作進呈批出竟不用先生所擬先生即引先朝楊大年在翰林草詔以一字不合真宗聖意明日援唐故事學士作文書有所改為不稱職當罷因亟求解職丐祠引去賈似道以漆木史

作字至先生勉留大畧云直院援楊大年故事豈非
亦有大年性氣邪如此者在先朝以為異後來皆以
為常近日馮王二直院所擬未嘗不反覆更定既曰
天子私人又豈不通商量只如每年春帖自有一等
忌諱字面上每令似道諭詞臣再三改定諸公亦惟
知謹承上意直院特未知之耳幸不必過為突兀而
有遐心至叩率幾台照先生貼名繳還來輒又上第
二章力丐祠東擔出國門而臺疏罷命出矣先生有

詩曰當年祇為青山誤直草君王一詔歸是也道體
堂謹書

擬冊立皇太子文

皇帝告曰朕弗克于德嗣先人宅丕后三十有七年夙
興夜寐怵惕惟厲懼無以追配于前猷自底不類迺季
秋將有事明堂思惟皇天全付于有家繼繼承承於千
萬年祖宗在天眷相惟茲蔽自朕志貽厥孫謀予一人
有辭郊廟神祇祖考將安樂之皇帝曰猷具官皇子某

爾忠孝豈弟少如夙成朕用疏爾王封衍爾賦畝欽迺服命克懋厥德惟爾休昭事有嚴俾爾圭鬯薄海內外罔不咸一其冊為皇太子改名某嗚呼厥惟我前人造天丕基創守惟艱哉天難諶命靡常民罔常懷懷于有仁戒之哉爾惟親正人學于古訓罔遊于盤罔淫于逸罔以非道孫志罔以古之人無聞知尊德崇道由仁義行乃若時守宗廟社稷以為祭主天地神人無疆惟休朕不失為知子爾亦有令名於戲欽哉

表牋

門謝表

臣某言伏準省札五月二十八日三省同奉聖旨文某
添差簽書寧海軍節度判官廳公事仍釐務臣以賜第
之初未經門謝未敢祇拜劄命申乞指揮續準省札七
月十一日三省同奉聖旨令朝謝訖之任臣謹遵奉指
揮詣闕廷朝謝者御大廷而發策式廣旁招奉清問以
摠忠謨承親擢尚阻紫宸之謝遽叨黃紙之除曠世遭

逢瞻天感激

中謝

臣切以賓興下詔同天地宗祀之彝

科舉取人代造化爵賢之柄豈曰利人才之進取其間
實天道之流行肆萬乘之臨軒受諸侯之貢士占小善
者率以錄咸造在廷取一人焉拔其尤必有名世豈應
庸瑣可在蒐羅臣稟質既凡聞道尤淺才非洛陽之年
少偶玷薦書學非廣川之大儒遽塵舉首自叨異數亦
既三年回思臚唱之蒙恩莫與鳬超而奉表有懷就日
無路箋天方傍徨於丘園乃寵綏其祿秩輒請展為臣

之禮幸許修詣闕之恭茲蓋伏遇皇帝陛下德體乾行道符常久世更三紀遠追成周式化之風歲啓後庚近接藝祖開基之運凡際風雲之會咸依日月之光遂令一介之姓名亦被九重之記錄臣敢不誓堅素守勉企前修自揆讀書非為晉生溫飽之計願言竭節用副上心忠孝之期臣無任瞻天望聖激切屏營之至謹奉表陳謝以聞

湖南提刑到任謝皇帝表

帝庭敷命昭闡四門天牧播刑誤頒一節申以遄驅之
旨疇茲已試之庸周隰載馳漢條具布中謝伏念臣本
無他技惟有孤忠兩朝特達之知洊歷清要十載行藏
之跡祇自悔尤雲雷之義方屯天地之心已復當元日
達聰之始在皇華遣使之中聖恩靡許於祝釐臣職敢
稽於行道瞻蓋高而下耳冀用譽於折肱茲蓋恭遇皇
帝陛下道協重華仁周四表崇德廣業合乾轉坤翕之
功折獄致刑得震動離明之用遂令承乏復忝司平臣

敢不祇若咨詢對揚欽恤陳時臬事尚弘康乂之圖受
王嘉師永迪明清之訓

謝皇太后表

司平楚甸命出嚴宸告至周原恩歸慈極敢敷睿訓仰
謝徽音中謝伏念臣一介寒微兩朝知遇傾葵向闕初
無補於使令啜菽杜門祇自深於觀省當元日會同之
始拜公朝拂拭之仁言遣使臣往陳臬事華省遙頒於
趣旨叢祠竟播于俞音勉臣子之驅馳見吏民而宣布

茲蓋恭遇壽和聖福皇太后陛下心超有極道合無疆
長信怡愉贊炎圖之昌運太任肅穆開蒼籙之隆平宜
擇攸司俾敬爾獄臣敢不丕承欽恤誕布慈仁乂我黎
民尚想無刑之治于其王母敢忘介福之元

謝皇后牋

君子審官道隆儷極皇華遣使命出治朝德意具宣忱
勤告至中謝伏念臣疎庸一介遭遇兩朝早綴班行嘗
忝金科之屬繼乘使傳復塵繡指之行曲成每戴於釐

明退食難逃於吏議不圖元會復錫恩言投拭起家往
陳時臬驅馳在道寅奉天威泣止攸司欽哉乃職茲蓋
伏遇皇后殿下德侔坤地位正家人闕睢之化既行用
之天下象魏之法使布正自王宮爰取踐更載叨詳讞
臣敢不靈承欽恤祇若平反無刑以乂黎民誕敷聖化
式敬以長王國永誦徽音

皇太子生日賀皇帝表

大夏長嬴坤二女之紀季千秋似續震一索之揆初瑞

彩緣車歡顏丹宸中賀恭惟皇帝陛下德流芑水業茂
蘿圖壽富多男積善必有餘慶本支百世命吉在厥初
生記甲觀之瑞分占乙禡之祚遠臣縻身軫墊戴目心
星誦億子之宜君首歌周雅祝萬年之為父更續唐詩
賀皇太后表

福于王母際南面之昌期天以神孫娛東朝之永日晝
堂瑞節長樂歡聲中賀恭惟壽和聖福皇太后性蘊沖
和仁培靜壽思齊所以聖也以御于邦螽斯宜爾子孫

克開厥後皇皇穆穆繼繼承承臣迹滯騏原心馳鳳闕
本支百世播緜緜之聲詩怡愉萬年衍含飴之福慶

賀皇后牋

坤后廣生式協二陽之月震男揆度載逢一索之期慶
衍蘿圖喜充椒掖中賀恭惟皇后殿下道柔配地德厚
承天以御于家為今京室之婦則樂有子如古周南之
風百世本支萬年福祿臣迹縻牡轡心賀燕謀占斯干
之詩已符吉夢美思齊之德益嗣徽音

皇子進封左衛上將軍嘉國公賀皇帝表

乾父垂仁茂積蘿圖之慶震男鍾美肇基茅土之邦百
世可知四方來賀中賀洪惟昭代愛立親親粵有舊章
禮優貴貴昉祥符之七載侈慶國之初封綺仗分班璫
珪疏寵庸表人倫之厚適觀王室之彊式于今休監于
成憲恭惟皇帝陛下福培周厚和緝堯雍寶歷無疆方
萬年而受祜金枝有煒期億子以宜君錫以嘉名汗其
大號地營東井詔爵五之最穹天拱北辰炳心三之相

照克昌厥後長發其祥臣有蹇牡駢阻隨虎拜祉歌子
施遥陳皇矣之詩道盡君嚴願贊家人之易

賀皇太后表

東朝保艾方隆堯母之仁西國分茅式篤文孫之慶兩
宮喜色萬宇歡聲中賀恭惟壽和聖福皇太后陛下德
厚慈元神怡長樂尊之至也上承視膳之勤宜爾繩兮
下適含飴之趣瑤池日永玉葉春濃臣遠被繡衣偷瞻
綵仗于其王母知介壽之來崇佑我後人願丕圖之有

行

賀皇后牋

坤稱乎母儼家服於椒塗震索而男赫龍光於茅土長
秋喜色方夏歡聲中賀恭惟皇后殿下含弘承天博厚
配地祥鍾長發熾商後於有娥音繼思齊培文昭於太
姒圭瓊焜煌於綺仗芾朱輝映於禕衣臣遠驟華原隄
瞻藻殿想宜君之穆穆茂對王休侈多子之繩繩載歸
后美

皇女進封同壽公主賀皇帝表

乾見大人道夙隆於乾體巽為長女命爰寵於巽申喜
溢宮庭歡騰海宇中賀竊惟興君之際必有積善之餘
播在正風則曰王姬之美陳于小雅是為女子之祥無
非歌福祿之同于以表國家之盛恭惟皇帝陛下和順
而理溫柔以容苞體深仁既茂繇瓜之徙岡陵厚積復
培穠李之華始封爰遴於嘉名遐祉永齊于聖壽臣跡
縻使事身隔賀班親愛如家遙贊人倫之厚肅雍迪教

通觀王道之成

卷四

賀皇太后表

周家福祿積由任如之仁堯母聖神親覩娥英之慶宮
闡盛典海宇歡聲中賀恭惟壽和聖福皇太后陛下南
極景光東朝綦貴有功寶祚既開聖子之傳流澤銀潢
爰毓天孫之瑞贊初封於沁水同上壽於瑤池臣遠玷
皇華隲瞻長樂怡愉太后諒承婉婉之娛雍肅王姬益
表儉慈之教

賀皇后牋

坤萬物之資生寶蕃慶積巽一索之謂長昉對命申喜
氣宮闈歡聲海宇中賀恭惟皇后殿下闕睢孝敬榮以
和平灼灼宜家夙範華桃之懿雍雍成德茂鍾穠李之
英賁然錫沁水之封展也同長秋之壽臣遠縻苞杞遙
睇塗椒風以周南仰化原之洵美觀于堯女願母道之
浚明

知贛州到任謝皇帝表

九重選牧錫類天寬千里承流奉親地近昉共侯度丕
戴王休中謝伏念臣某才本空疎分安孤苦身逢盛代
夙自厲於丹心家有重親晚相依於白髮頃叨漢傳往
即楚封何敬非刑粗殫審克不遑將母私切懷歸嘗懇
懇以陳情冀高高之從欲遙蒙異渥特畀近麾繼膺常
以趣征已鞠躬而祇上祿及一門之微賤恩同大造之
生成茲蓋伏遇皇帝以堯舜之資行曾閔之道嗣寧王
之大歷必我成功奉太后之萬年與天齊壽遂使忝求

芻之寄亦獲共啜菽之歡臣敢不老老及人親親為政
由家達國期興讓以興仁以子移臣寓為忠於為孝

謝皇太后表

東朝鴻慶介壽無疆南國虎符便親有命荷中宸之渙
寵望慈極以皈忱中謝伏念臣一介迂疎兩朝遭遇昔
備殫於敷歷無以逾人頃間任於驅馳不遑將母質內
懷於鳥哺遂上徹於蟻忱果分二水之麾爰易三相之
節惟壤地接故可以供菽水之職惟土風習故可以盡

芻牧之心自省叨諭若為報稱茲蓋恭遇壽和聖福皇
太后陛下德光堯母功配周姜壽錫萬年享怡愉之福
化流四海推慈身之仁遂令下吏之僥榮獲以邇封而
就養臣敢不祇承德意謏布恩言服膺錫類之詩益崇
美化拜手牧民之訓諭贊徽音

謝皇后牋

慈極承天恩深錫類庶車易地職重分符布聖德之中
和便親闡之溫清中謝伏念臣起繇孤遠積有迂踈骯

麟半生於事君而何補驅馳近歲以將母而未能屬為
養以陳情荷畀矜而從欲三湘納節二水授麾回刺史
之車庶乎為子捧郡守之檄專以為親僥冒實多糜捐
曷稱茲蓋恭遇皇后殿下道隆坤厚德配乾仁大雅思
齊媚周姜而穆穆長秋備禮奉漢母以愉愉遂令疎遠
之微臣亦效旨甘於便壘臣敢不恪恭侯度茂對王休
崇闕睢卷耳之風迪惟懿則篤南陔白華之行施及遐
萌

壽崇節本州賀皇帝表

天子有親備四海九州之奉封人祝聖同萬年億載之
期凡屬照臨舉同呼舞中賀恭惟皇帝陛下剛健中正
緝熙光明燭六合而耀八紘功參天地躋三皇而軼五
帝道御家邦紹巍巍蕩蕩之勲盡尊尊親親之養怡愉
誕節光大前聞臣獲布寬條幸逢盛際鵷鸞阻綴莫旅
賀於東朝螻蟻傾忱惟仰瞻於南極

賀皇太后表

於萬斯年慈宸有慶誕彌厥月祖佛同生疏冕敬共縉
紳舞蹈中賀恭惟壽和聖福皇太后陛下道超太始德
厚重坤闕睢周南之風夙陶美化思齊文王之母懋著
徽音袵衣初奏於薰絃宮珮畢朝於慈宸親下袞龍之
拜載揚韶鳳之音呼萬歲者三歡騰朝野等百世而上
福衍子孫臣叨守魚符莫陪駕序我百而爾九十諒喜
溢於舉觴心一而臣三千第神馳於拱極

賀皇后牋

太姒之嗣太任星重慈極長秋之朝長樂天介壽祺流
慶九霄比隆千古中賀恭惟皇后殿下明章德範陶冶
化風大練厚繒訓四方之節儉宵衣旰食脩五位之勤
勞肖似徽音婉愉誕序厚符坤地吉萃家人臣遜守遐
邦忻逢華旦仰瞻帝闕莫陪振鷺之班下與邦民同被
闕睢之化

壽崇節兵馬鈐轄司賀皇帝表

天子盡敬事親丕昭瑞節臣下歸美報上同祝脩齡覆

載兩間頌歌四洽中賀恭惟皇帝陛下克勤克儉無怠
無荒堯以是傳道莫高於虞舜文所以聖德益顯於大
任有開麗水之祥適際瑤池之會臣屬縻戎鍵阻綴班
聯北面而朝恍天威之尺五南山之壽效臣子之呼三
賀皇太后表

金闕日長尊處宸闈之極玉卮春滿誕膺法駕之朝凡
在式園率均擊壤中賀恭惟壽和聖福皇太后陛下心
遊恬淡德著慈仁隆周召之風人倫既正養黃老之性

母道獨尊皇穹申方至之休壽命行無疆之筭臣猥分
郡組共貳戎韜迹遠觚稜惟幄諭瞻於長樂忱同葵藿
笙璫第想於承華

賀皇后牋

坐於少廣慶慈極之誕彌朝于寢門助聖人之教愛宮
庭溢喜宇宙同和中賀恭惟皇后殿下瑞應倪天光昭
邇日正始基化歌二南采苻之詩視膳問安備六寢禕
褕之禮協朱明之律呂鏘綵仗之珮環驩奉玉卮禮同

黼宸臣監紆州紱通領兵符聆舜樂之九成遙瞻南面
效堯階之三祝竊比華封

乾會節本州賀皇帝表

一人天拱適符龍御之亨萬國雲從共慶虹流之瑞系
隆宗社福被寰瀛中賀恭惟皇帝陛下曰睿曰聰乃文
乃武金甌有永紹寧人大寶之休翠蹕早朝娛太后萬
年之壽當嵩呼之華旦總夢月之佳辰兩宮同時千載
盛事臣猥叨分竹彌切傾葵奉玉卮之恭阻綴班於北

闕通銀臺之奏但申頌於西崑

賀皇太后表

六龍御極增光長發之詩萬國同心推本思齊之聖驩
騰宮壺和塞堪輿中賀恭惟壽和聖福皇太后陛下曰
希曰夷爰清爰靜以天下養備百祿之熾昌與元氣游
葆六根之純粹海內樂唐虞之化宮中頌任姒之音臣
切預承流遙伸歸美冬溫夏清禮嚴東面之朝日升月
常福等南山之祝

賀皇后牋

黼宸端臨交上華封之祝御深內助仰承京室之規喜
溢六宮和薰八表中賀恭惟皇后殿下靜專成性徽懿
秉姿珥簪進庭燎之歲雞鳴有度弓韉奉高禋之祀燕
翼發祥際上帝生商之辰懋塗山興夏之德仰占七政
日月並明俯鑒四方岡陵齊壽臣分符江右化被周南
首贊乾亨體天行之不息更祈坤載協地道之無疆

乾會節鈐司賀皇帝表

龍首庶物覩大德之照臨虎拜萬年對王休而蹈厲堪
興協氣海宇頌聲中賀恭惟皇帝陛下神聖整齊武文
經緯諸福畢至一登再登三登我武維揚五伐六伐七
伐虹者載臨於盛旦鳳音遙想於明庭臣通領鈐符恪
共官次葵傾觀闕阻陪就日之班花覆簪紳隃謝需雲
之宴

賀皇太后表

天下傳歸于子降寶冊之鴻名聖人教愛以親上玉卮

之曼壽非常之慶嘉頌攸同中賀恭惟壽和聖福皇太
后陛下沖澹顧神儉慈孚化輔佑先帝夙殫卷耳之勤
愉佚東朝允著思齊之聖防前殿紀誕彌之旦正羣方
傾就望之忱肆應鳳輦之朝親下龍綃之拜臣屬縻戎
鍵阻綴班行現五色之雲知獻占於太史舞兩階之羽
諒增喜於慈顏

賀皇后牋

上萬歲之壽咸頌聖人形四方之風實基王化凡居持

載罔不驩呼中賀恭惟皇后殿下生稟靜柔安行雍肅
躬河洲采荇之潔列聖顧歆翼寢門視膳之恭慈顏和
懌合坤其順遡日而明欣聆嵩嶽之呼並受華封之祝
臣俯共武服仰贊壽觴星之遠天之高陞莫瞻於九級
漢之廣江之永詩但誦於二南

皇子賜名本州賀皇帝表

家有嚴君托中興之昌歷天以聖子作大國之宗藩喜
溢宮闈慶闕宗社中賀恭惟皇帝陛下懋昭聖德厚正

人倫保天命以宜君四方無侮貽孫謀而翼子百世可
知爰錫嘉名載敷大號敬哉有土肇基二水之邦格于
皇天式應三星之曜俾耆而艾長發其祥臣縻跡侯方
傾心魏闕監王成憲願垂謨烈之休啓我後人益壯本
支之盛

賀皇太后表

東朝介福式彰母道之尊南國分封庸迪孫謀之吉兩
宮交慶百世彌昌中賀恭惟壽和聖福皇太后陛下長

樂怡愉大庭游行養以天下日永瑤池正于家人春生
玉葉贊苴茅於浯水壯繇陟於宗藩臣逝在侯方阻瞻
宸仗思齊所以聖遙頌徽音皇矣莫若周益隆世德

賀皇后牋

母資坤德之生椒塗襲慶男正家人之吉茅土分封宗
社延洪宮闈閭懌中賀恭惟皇后殿下承天光大法地
靜專成美化於周南言能逮下嗣徽音於京室予以御
家屬聖子之勝衣贊嚴君之錫爵臣遠縻外服阻造內

班正風俗以厚倫永歌后德輔皇王之維辟丕俟孫謀
皇子賜名鈐司賀皇帝表

天佑我家篤生聖嗣國有鉅典肇建宗藩社稷靈長神
人孚洽中賀恭惟皇帝陛下禮行貴貴愛立親親撫寶
歷之昌期萬年福祿演銀潢之慶澤百世本支爰重燕
謀載頒鴻號于疆于理地營浯水之邦有翼有馮星拱
周廬之衛克開厥後俾熾而昌臣遠繫戎韜諭瞻文石
施于帝祉德已動於監觀保我後生命更歌於壽考

賀皇太后表

堯母怡愉介于景福湯孫岐嶷錫以嘉名慶衍宗祊歡
隆慈極中賀恭惟壽和聖福皇太后陛下爰清爰靜曰
希曰夷佐先帝之中興鷄鳴有度膺嗣王之孝養燕翼
成謀爰鍾受於綠車乃分封於赤社臣恪恭武服阻造
王庭以御于家踰贊思齊之德克開厥後佇成皇武之

功

賀皇后牋

坤稱乎母作德配天震索而男建邦有土慶成宗社喜
溢宮庭中賀恭惟皇后殿下采芣和平闕睢孝敬嗣母
徽於京室在廟在宮明子道於家人正內正外歡動勝
衣之拜光昭壽社之封臣共武有嚴稱班云逖風以周
南之化踰贊僉斯烝哉豐水之謀適觀燕翼

皇帝登寶位本州賀皇帝表

天作之君表冠倫之大聖父傳於子昭立嫡之至公歷
數維新神人胥協中賀恭惟皇帝陛下以周元子為舜

重華大德生知聰明以臨齊莊以敬一人有慶進退可
度容止可觀積素厚而孫謀深謳歌同而神器定無為
而治有道之長臣叨領虎符踰瞻龍御建皇極而王天
下幸際昌期開明堂而朝羣臣聳觀初政

賀太皇太后表

肇聖德之龍飛運開昌歷垂孫謀之燕翼功出慈宸九
廟尊安八紘抃蹈中賀恭惟壽和聖福太皇太后陛下
道光任似行邁塗莘範肅東朝性適含飴之樂規重南

面養親視膳之榮光昭嫡統之傳丕行皇家之慶臣叨
紆守紱阻適賀班頌皇帝上萬年永言齊壽佑寧人之
大歷尚克圖功

賀皇太后表

震出麗天重明繼序坤稱正位一統蒙休基祚斯皇幅
負胥慶中賀恭惟皇太后陛下輔佐先帝憂勤王家思
媚周姜履肅雍於京室訓貽禹子服勤勞於塗山瑞昭
南面之符光疊東朝之矩臣屬縻侯服隕企慈帷嫡統

無疆已慶大橫之兆嗣徽有秩尚稽小愆之謀

皇帝登寶位鈐司賀皇帝表

乘時御極宣日月之重光居嫡宅尊大春秋之一統幅
員愛戴宗社安強中賀恭惟皇帝陛下仁孝生知聰明
時又踐寧王之丕祚大歷維新奉文母之徽音皇天有
慶宜首正飛龍之御以上承翼燕之貽無疆維休有相
之道臣濫巾戎轄阻籓朝班五百歲而生幸親見聖萬
億年其永不替惟王

賀太皇太后表

兆協大橫運在當命之聖謀貽小成功歸太上之慈嫡
統延洪皇圖鞏固中賀恭惟壽和聖福太皇太后陛下
躬基美化教闡徽音彤管光華配豐功於祖烈練衣朴
素示懿訓於孫謀聿新歷服之傳式副簾帷之託臣司
戎共貳望闕呼三庶民近天子光忻逢昌歷太極為元
氣母永迪初基

賀皇太后表

震主宅尊光紹寧王之命坤元居正適彰大如之音一
統親傳萬邦胥慶中賀恭惟皇太后陛下功侔持載德
備含弘風化二南行傳家之忠厚本支百世肇繼序之
聖明大春秋正嫡之書應日月重光之運臣屬兼鈐紱
阻造軒惟在天利見大人已孚文命介福于其王母長
詠思齊

謝皇帝登極赦文表

日月重離開國家之休運雷雨作解溥天地之至仁萬

邦咸休一人有慶中賀恭惟皇帝陛下堯文光宅舜德
出寧神聖為君丕受皇天之命春秋立嫡聿昭正統之
宗爰肆眚於端門示湛恩於熙代臣猥分銅虎隄企金
雞大人繼照四方聳觀初政皇極敷錫五福第奉寬書
太皇太后加尊號本州賀皇帝表

御丕圖於南面順應天人崇徽冊於東朝重增宗社億
年縟典萬國懽心中賀恭惟皇帝陛下皇極之宗人倫
之至性同符於堯舜達孝升聞訓一本於姜任徽音有

秩紹寧王之明命彰祖后之尊稱臣分牧有嚴承休胥
祚介福于王母難名太上之功肖德以神孫願共無疆
之號

賀太皇太后表

鴻名揚厲用彰重慶之尊龍宸繼承懋舉盡倫之制明
廷孚號寰宇傾心中賀恭惟壽和聖福太皇太后陛下
德備儉慈教修愛敬佐我烈祖成天保之憂勤訓于神
孫示思齊之雍肅粹美翟禕之服增華琬琰之章臣屬

守銅符欣侍寶冊同御延和之殿誕頌前猷尊居慈福
之宮永言至養

賀皇太后表

統繼堯天重華協德位隆文母太如嗣音寰宇休明內
庭肅穆中賀恭惟皇太后陛下行高配地秘大補天輔
先帝以重光憂勤夙至肇嗣王之丕緒福祿方來奉寶
冊於重闈壽皇圖於覆載臣屬縻郡紱阻遙廷紳咸曰
太皇已慶元和之壽願言帝母永肩長樂之名

太皇太后加尊號鈐司賀皇帝表

皇圖嗣慶著母道於重坤鉅冊稱尊告王庭而大渙宮
闈增重宗社蒙休中賀恭惟皇帝陛下德為聖人孝治
天下侍宣仁之聽斷元祐同符稟慈福之起居紹熙儼
美播無為之懿號隆太上之徽音臣猥介戎鈐聳觀國
典思齊文母既彰有德之雍雍於赫湯孫願共厥聲之
穆穆

賀太皇太后表

離日方升光傳龜寶坤元重慶肇建鴻名福萃三宮歡
騰八表中賀恭惟壽和聖福太皇太后陛下佐佑皇祖
怡愉東朝德配姜任植丕基於蒼籙功高馬鄧扶洪業
於炎圖宜效美於思齊大歸尊於長樂臣偶叨戎轄阻
綴朝班丕哉烈丕哉謨共僖嗣王之政得其名得其壽
載揚太上之休

賀皇太后表

晉大號於重闈位隆長樂紹丕基於萬世慶本慈元命

肅治朝禮行廣內中賀恭惟皇太后陛下頤神沖澹履
行靜專美紹思齊宜毓文王之聖訓垂訪落實開成后
之謀贊重慶於御簾推有尊於臨制臣猥分戎轄隃聽
恩綸望少廣之宸居莫班獸舞頌長秋之壽歷同播鴻
名

皇太后加尊號本州賀皇帝表

嗣王受此丕基光膺明命文母介以繁祉祇奉嘉名典
冊流輝幅負有慶中賀恭惟皇帝陛下一人出震五位

乘乾玉寶金相嗣延洪之大歷寶祿羽翟奉雍肅之徽
音光進瑤編重增鼎祚臣叨分虎壘隄望龍墀保佑恩
深已際大明之運怡愉樂永更揚齊壽之休

賀太皇太后表

毓正神孫方布應門之詔位尊祖后復隆京室之稱重
慶萬年丕休四海中賀恭惟壽和聖福太皇太后陛下
性超太上德應黃中元祐大法宣仁之鞠育紹熙新
政燕慈福之起居宜旌坤極之嘉名式趾太任之芳躅

臣屬分侯服欽誦王綸天子必有所尊已光載籍聖德
無加於孝長戴兩宮

賀皇太后表

坤稱正位訓迪嗣王渙號揚庭尊歸文母簾帷介福社
稷垂榮中賀共惟皇太后陛下德著憂勤躬行慈儉虞
嬪觀于媯汭密贊聖謨后稷生於姜嫄美鍾神胄晉長
信尊尊之號嗣思齊秩秩之音臣忝守藩維阻趨軒陛
得其名得其壽幸同萬國之歡宜爾子宜爾孫永頌兩

宮之慶

皇太后加尊號鈐司賀皇帝表

重明以繼大人瑤圖垂慶介福而于王母玉冊有光瑞
溢簾帷重闕宗祏中賀恭惟皇帝陛下敬仁成性歷數
在躬惟后綏猷蹈堯舜之孝弟因親教愛奉任如之肅
雍宜申慈極之尊式表聖倫之至臣叨兼兵轄隄企陛
簾贊長信之徽稱已光漢制頌塗山之丕訓益大禹功
賀太皇太后表

嗣皇奉冊尊歸長信之名祖后宣猷夙迪思齊之訓萬
年集慶八表蒙休中賀恭惟壽和聖福太皇太后陛下
德邁維莘道高于汭金車玉路備三世之典章寶翟珍
褱示六宮之法度美慈宸之疊矩揚大號以同符臣兼
領戎鈐竦聆郵綍德壽早朝之典已慶淳熙延和同御
之功益歌元祐

賀皇太后表

文母克昌厥後光紹皇圖大德必得其名慶隆寶冊四

方來賀百志惟熙中賀恭惟皇太后陛下陰教齊家慈
元正位推為美化邁周召之二南著在徽音紹姜任之
大雅宜膺渙號增重坤稱臣適貳韜鈴聳聆綸綍踐其
位行其禮莫重尊親求厥寧觀厥成適追來孝

大行皇帝升遐本州慰皇帝表

堯父宅尊春秋鼎盛祀天告墜遠邇震驚降割非常銜
哀罔極恭以大行皇帝神聖文武濬哲溫恭萬千歲怡
愉恪盡東朝之養十一年寅畏適祇上帝之威期壽考

之惟休俄憂勤而積疾詎圖大漸驟至遐征望欲斷於
遺弓命忍傳於憑几中慰恭惟皇帝陛下有仁有孝盡
制盡倫克念先猷根聖人之至性誕承慈訓服天下之
通喪願少抑於孝思以永綏於神器臣屬縻守紱哀捧
告書莫伸奔問之恭徒切攀號之痛

慰太皇太后表

雞鳴問寢方慈極之深居龍去遺弓忽皇輿之新陟宮
闈震悼海宇摧傷中慰恭惟壽和聖福太皇太后陛下

德備周姜道光堯母東朝垂訓曾不改於儉慈南面積
憂遽忍違於溫清驟罹國殃諒切聖懷少寬憑几之思
式副御簾之託云云

慰皇太后表

皇靈新陟變撫遺弓儷極永懷悲興捐玦六宮哀痛九
宇摧傷中慰恭惟皇太后陛下坤道宅中家人佐正脫簪
而諫期共濟於中興綴衣于庭忍遽聞於末命雖委裘
之悲至切而定鼎之託方新願制盡傷永綏敷遺云云

大行皇帝升遐鈐司慰皇帝表

王宜日中方慶垂衣之治父有天下遽傳憑几之言宗社憫凶幅員哀痛共以大行皇帝王道正直帝德簡寬奉長樂之清溫丕昭仁孝聽通英之勸誦適紹文明方嗣服於萬年胡委裘於一旦烏號罔極龍御何追中慰共惟皇帝陛下聖德升聞孝思永慕重華協帝方遏密於八音冢宰總官將諒陰於三祀願少紓於聖抱以弘濟於皇圖臣逖領戎昭哀傳國疚阻伸奔問惟重摧傷云云

慰太皇太后表

嚴宸居正痛晏駕之奄聞慈極宅尊悵早朝之遽隔哀
傳海宇悲結簾帷中慰恭惟壽和聖福太皇太后陛下
德厚承天恩深與子夙行恭儉聖方頌於思齊晚享怡
愉變忍聞於顧命諒聖情之結戀鑒興志之攀號願抑
慈懷永謀孫翼云云

慰皇太后表

變興梧野九土烏號悲結椒塗六宮縞哭宅憂罔極降

割何深中慰恭惟皇太后陛下志紹徽音躬行美化冬
溫夏清佐孝養於東朝海潤星暉演慶源於中壺驟撫
鼎湖之戚奚堪與極之哀願抑慈懷聿扶新政云云

百日慰皇帝表

烏號浸遠九土同悲駒隙易流十旬如隔撫時哀疚易月
徬徨中慰恭惟皇帝陛下歷數有歸羹牆如對雖擗踊
哭泣曷勝父子之情而朝覲謳歌當慰臣民之望願節
宅憂之制益成繼志之圖臣承乏偏城阻趨嚴陞云云

慰太皇太后表

鳥號銜恤悵再隔於月遊龍寢闕朝恍十周於日浹流光何凍哀思欲摧中慰恭惟壽和聖福太皇太后陛下宮壺宅尊簾帷託重雖道揚王命不勝慈極之懷然燕翼孫謀當念皇圖之本願體臣民之戴少寬朝夕之思云云

慰皇太后表

雲升梧野頓隔千秋日短冀階駕言十浹委裘禍迫捐

玦哀深中慰共惟皇太后陛下教盡人倫慶隆母道雖
易月以日難窮伉儷之悲然薦子於天正重攜持之託
願俯從於中制用式副於羣情云云

期年慰皇帝表

追玉几之遺言制嚴易月服練冠於初祭哀重感時霜
露深悲乾坤罔極中慰恭惟皇帝陛下孝治天下統承
先王雖見堯於牆克篤終身之慕然續禹之服所期大
器之安願從禮制之宜少副輿情之望臣屬縻藩屏阻

造闕庭云云

慰太皇太后表

訓予命汝易月有嚴練而慨然周星何短哀承遺制痛
結慈衷中慰恭惟壽和聖福太皇太后陛下德紹宣仁
功侔明肅天經地義扶嫡統於方新日邁月征悵宸旒
之愈遠願勉從於衆志姑少抑於至情云云

慰皇太后表

悲捐玉玦痛極呼天祭服練冠制嚴易月乘雲浸遠濡

露何堪中慰恭惟皇太后陛下德佐先猷慶鍾神胄雖
徬徨虞汭望欲斷於蒼梧然婉變周姜任方隆於京室
願少寬於哀抱用丕贊於鴻圖云云

再期慰皇帝表

龍湖未遠可傷易月之喪駒隙幾何已舉再期之制漢
牆如在霜露孔哀中慰共惟皇帝陛下道盡人倫位隆
世嫡雖終身慕父難窮至性之悲然億載怡親方疊慈
顏之養願重承休之託少寬追遠之懷臣隕綴藩宣阻

班軒陞云云

慰太皇太后表

終天巨釁降割一朝易月通喪寓言再歲仙遊未遠慈
抱難居中慰恭惟壽和聖福太皇太后陛下功在先朝
志勤內治雖變生憑几悵闕問於鷄鳴然寄重垂簾方
稽謀於燕翼願抑無疆之恤益昌有大之休云云

慰皇太后表

望斷乘雲悵龍驂之浸邈制嚴易月愧鳳歷之再周凡

屬憐持式同追慕中慰恭惟皇太后陛下承天功大與
子仁深雖悼舜陟方不替蒼梧之望然開周嗣歷方隆
豐芑之休願少抑於哀悼用永綏於神器云云

禪祭慰皇帝表

龍御何之方切綴衣之痛駒陰未遠已驚釋禪之期易
月從宜感時增疚中慰恭惟皇帝陛下恭默思道愛敬
事親天作之君當周艱而即命日致其孝將舜慕以終
身願寬追遠之至情丕慰含生之顙望臣濫承郡紱阻

綴朝班云云

慰太皇太后表

袞衣萬歲痛隔終天禪服一朝權從易月感時憂戀率
土盡傷中慰恭惟壽和聖福太皇太后陛下德著寶祿
功藏金匱撫鼎湖之龍去子保何追懷豐水之燕貽孫
將有行願副普天之望式紓慈極之悲云云

慰皇太后表

宮車輟駕浸遠翠華國典行權恍終素蹕託言釋禪胡

忍免喪中慰恭惟皇太后陛下夙著脫簪驟懼捐玦雖
梧雲不返永為禕翟之傷然芑水方來共徯簾帷之助
願釋居諸之感俯從遐邇之情云云

賀皇帝聽政表

思皇烈考誕受寶龜於穆嗣王甫攸治象慈簾保佑熙
政闔明中賀共惟皇帝陛下德實天生動為世則入于
翼室稱元子以宅宗出自應門會諸侯而作誥欽奉怡
愉之訓爰親兢業之幾既兩宮垂拱以無為宜四海謳

歌而來觀臣屬縻郡國踰戀闕庭御延和殿之正朝願
光祖烈奉紫雲樓之盟誓第守藩條

賀太皇太后同聽政表

綏壽而右文母高拱慈宸肖德而有神孫共臨幾政徽
音洋溢光訓昭宣中賀恭惟壽和聖福太皇太后陛下
功邁塗山德高嫺內施于帝社已深慶錫之源保我後
生益衍壽寧之福章憲垂簾於天聖宣仁稱制於延和
紹昔大猷為今懿範臣屬縻守紱欣聽俞綸太易太始

太初莫測無為之化四門四聰四目共觀有道之朝

天瑞節本州賀皇帝表

龍出御天重華于帝虹書流渚長發其祥萬姓驩呼三
辰擁佑中賀恭惟皇帝陛下聖德克肖天性自成光北
斗之樞篤生黃帝美南山之壽誕命文王節屆千秋時
維九月臣縻身侯度拜手王休三千臣同心永言華壽
五百年生聖敬贊河清

賀太皇太后表

聖王垂拱萬年方開燕翼太皇怡愉億載親見虹流海
宇春輝宮闈日永中賀恭惟壽和聖福太皇太后陛下
身基美化德著慈元正位而定家人功高配祖介福而
于王母慶積貽孫律協素商節書金籙臣濫膺藩屏阻
賀簾帷假樂命之慶春秋之鼎盛思齊聖也同日月之
離明

賀皇太后表

龍德方升祥書載震燕謀有慶福萃重坤旗翼光華幅

員熙洽中賀共惟皇太后陛下道侔博厚德備仁明虞
汭來嬪女于舜帝周京作配生此武王方觀日上於扶
桑隨虹流於華渚臣濫叨一障隄企千班大域中王既
祝華封之壽為天下母願齊西極之年

天瑞節鈐司賀皇帝表

謳歌與子方開捧日之祥福祿宜王初紀流虹之慶光
生宗社歡溢堪輿中賀恭惟皇帝陛下天德生知乾元
首出載震載夙膺天地之珍符繼聖繼明正春秋之嫡

統當瑤光之瑞節際金顥之昌辰臣分虎有嚴扞鼇欲
舞呼玉卮之萬歲愉贊王休進金鑑之千秋嗣殫臣職

賀太皇太后表

萬壽齊天思齊以聖千秋紀日長發其祥廣宇休揚重
闡慶洽中賀恭惟壽和聖福太皇太后陛下以女堯舜
為今似任有典有則之貽輔于皇祖立政立事之準訓
乃文孫當月屆于素商喜節書於華渚臣猥塵戎輶阻
賀宸闡請祝聖人既效堯封之職亦右文母載賡周頌

之章

賀皇太后表

辛歲重光昔符夢日乾元首出今紀流虹歡溢華封慶
歸長信中賀恭惟皇太后陛下徽音大雅美化二南德
配重華觀嬪于汭祥開長發立子生商扶暘谷之初升
記高禰之載誕臣領鈐偏郡銜表明廷五百歲河清既
覩聖人之出三千年桃實願同王母之尊

大行皇帝謚號本州慰皇帝表

祀以配天致聖人之達孝廟可觀德彰烈考之隆名典
冊千年宗祧九鼎恭以端文明武景孝皇帝光宅天下
簡在帝心敬直義方煥經天而緯地事名物應昭修政
以攘夷大德大功立親立愛自生民而未有熙鴻號於
無窮中慰恭惟皇帝陛下離象重光乾龍首出聖盡倫
王盡制始于家邦宗有德祖有功行其典禮式崇徽譽
昭對皇靈臣叨領虎符欽傳駿命告神明頌盛德已觀
國典之光薦郊廟揚洪休尚述侯邦之職

慰太皇太后表

居長樂之宮興懷鶴駕瞻顧成之廟肇錫鴻名大冊垂榮慈衷悼往中慰恭惟壽和聖福太皇太后陛下以天下養與元氣游明肅臨朝親立仁皇之策宣仁在御永懷神考之思丕對皇靈昭升熙號臣屬縻侯紱阻慰宸簾云云

慰皇太后表

九疑陟遠莫返皇靈七廟升宗聿彰世德洪名有赫哀

抱彌深中慰恭惟皇太后陛下位正家人道隆坤母躬
葛覃之節儉厥配有光秉清廟之肅雍于嬪增感於惟
大冊肆對皇穹臣跡繫分符神馳望闕云云

大行皇帝謚號鈐司慰皇帝表

翼室宅宗考先王之制禮觚壇告帝為烈考以易名大
冊適彰皇靈昭假共以端文明武景孝皇帝體元居正
持盈守成端獨化之原文經天地明萬幾之理武定邦
家景行有容孝思無極上可以配祖宗之德下可以垂

子孫之休中慰恭惟皇帝陛下弼我不基鑒于成憲寧
王克綏受命篤悲忱辭嚴父莫大配天答揚光訓奉徽
稱於宗祀昭縟典於明時臣通領戎昭竦承帝號堯萬
世如見莫名魏蕩之功周諸侯來朝第贊肅雍之相

慰太皇太后表

盛德之祀百世肇建嘉名太皇之壽萬年興懷縟典慈
宸惻楚穹覆鑒觀中慰恭惟壽和聖福太皇太后陛下
懿範兩朝仁恩四海為元氣母克篤貽孫育天下君忍

聞祔禰哀時大號對越皇靈臣身貳戎鈴心懷國典云云

慰皇太后表

大德得名尊歸昭考嗣王謀廟上奉徽音宗禰休揚宮
闈愴極中慰恭惟皇太后陛下儉昭練服中協黃裳嗣
任德之肅雍思齊以聖名堯功之魏蕩煥有其章聿深
羽翟之懷於赫觚壇之告臣猥兼戎輅愉贊邦彝云云

冬至節本州慰皇帝表

一陽來復感駒隙之易流三祀諒陰悵烏號之浸邈愴

深履鞮悲著美牆中慰恭惟皇帝陛下清明在躬恭默
思道水有源木有本方嚴祭祖之時霜既降露既濡不
替思親之念少抑居諸之慟仰膺付託之隆臣逖守遐
邦阻班嚴陞誦先王省方之戒願謹起居乘諸侯謀廟
之忠聿懷奔走

慰太皇太后表

暖律吹噓感一陽之初復慈簾擁佑訓三祀之通喪痛
在宮闈情均海宇中慰恭惟壽和聖福太皇太后陛下

徽音慈福懿範宣仁履韞迎長天休方至冕旒問寢子
保奚追願少抑於慈懷以永綏於孫翼臣屬縻俟服阕
企御闡云云

慰皇太后表

復陽在地氣應黃鍾坤德承天悲深素鞞六宮增疚萬
宇永懷中慰恭惟皇太后陛下長信宅尊思齊繼美手
扶宮日坐占千歲之長目斷臺雲尚想九疑之遠願紓
哀於儷極以永翼於皇圖臣逖守江城瞻禁闕云云

啓殯慰皇帝表

三年諒陰不言悲深翼室七月同軌畢至告啓散塗遠
日戒嚴終天增慕中慰恭惟皇帝陛下外勤謀廟內奉
臨朝制爰舉於因山龍輜將駕情永懷於陟岵鳳紼奚
追願寬劒舄之思益重基圖之託臣屬縻斗壘阻慰宸
庭云云

慰太皇太后表

居長樂之漢宮永懷鶴駕卜會稽之禹穴垂戒龍輜悲

結慈闈痛均薄海中慰恭惟壽和聖福太皇太后陛下
憂勤德備擁佑功高百世可知首正貽孫之則七月而
葬豈勝思子之懷願東望以節哀重外朝之同御臣身
縻乘障跡阻趨班云云

慰皇太后表

龍湖言遠椒掖永懷鳳輦戒嚴敢塗載闢六宮雨泣萬
宇雷哀中慰恭惟皇太后陛下儼極勲高正家化洽撫
軒皇之劔舄祔賁橋山奉舜帝之衣裳思藏梧野向軫

乾坤之記願紓朝夕之忠臣身繫分符神馳攀紼云云
發引慰皇帝表

鸞車既駕陟岵哀深龍匣畢塗崇丘制舉新宮永閔翼室
增傷中慰恭惟皇帝陛下思道諒闇送終哀感居喪讀
塋禮不愆復土之期因山不起墳尤切望陵之感異少
寬於孺慕以丕重於宗祧臣縻跡侯藩傾心宸陛云云
慰太皇太后表

日淪西極悵鶴駕之長遊天拱東朝痛龍湖之永閔重

闡悲繫九土慕思中慰恭惟太皇太后陛下福備怡愉
功高擁佑撫綴衣於翼室億世貽孫念加斧於畢塗千
秋望子願抑思齊之感益昌小政之謀臣叨領偏城阻
趨慈陛云云

慰皇太后表

國謹重喪龍棺就殯禮襄大事鸞掖興懷海宇同哀山陵
告備中慰恭惟皇太后陛下憂勤孔夙哀感謹終媯汭
居諸悵虞琴之已遠會稽咫尺望禹穴以奚追願紓既

葬之悲式相維新之治臣承流有守伸慰無從云云

祔廟慰皇帝表

先帝之葬衣冠載虞神祐嗣王之奉宗廟丕祔皇靈昭
穆用休典章備舉中慰恭惟皇帝陛下以舜大孝居商
諒陰如慕如疑既畢因山之禮以享以祀載嚴升禩之
恭勉承翼翼之容深抑煢煢之感臣屬縻牧訓阻奉駿
奔云云

慰太皇太后表

嗣王宅恤奉先祐以升宗聖母思齊感皇靈而悼往禮
容有赫祀事孔明中慰恭惟壽和聖福太皇太后陛下
壽考維祺儉慈為寶佑我烈祖有典則以貽子孫保予
沖人修宗廟以序昭穆祔既行於永紹哀少釋於慈元
臣叨綴蕃宣阻班奔走云云

慰皇太后表

地隔丹洲畢舉九虞之際天臨濟廟昭升七世之宗禩
主思皇椒闈若惕中慰恭惟皇太后陛下性鍾慈儉德

備憂勤嬪虞帝以曰欽陟方浸邈對文王之於穆率祀
惟恭願紓坤極之思益衍乾符之慶臣屬縻民牧莫效
侯朝云云

正旦慰皇帝表

王正書月景命維新靈德在天孝思罔極運開歷數哀
動几筵中慰恭惟皇帝陛下思道奉先與時更始王受
同琬祭不替於元辰帝見羹牆禮益嚴於上日願抑居
諸之感丕承擁佑之恩臣屬守偏城阻趨嚴陞云云

慰太皇太后表

正月始和律更太簇昊天不弔痛在思齊歷數維新宮闈孔惻中慰恭惟壽和聖福太皇太后陛下為元氣母與太極游孟春而戒適人撫時其邁上日而受文祖擁治方新願寬丕子之思益重神孫之託臣屬縻宣化阻慰履端云云

慰皇太后表

羲日更新治開泰象虞雲浸遠悲在坤元駒隙易流烏

號何及中慰共惟皇太后陛下光輔先帝敬授人時元
會衣冠尚想熙明之政月游劍舄忍聞永紹之名願寬
悼往之哀悼益撫履端之昌運臣屬縻一障阻慰三朝
云云

改元賀皇帝表

春王會於三朝慶開景運皇天佑于一德治紀初元正
朔肇新乾坤有造中賀恭惟皇帝陛下春秋正始歷數
在躬仰則定陵開三傳之丕祚近稽哲祖基七葉之昌

期放鳳歷以改絃衍鴻圖而卜鼎臣親逢更化適綴承
流揚偉蹟鋪闕休恪共侯度撫太平應昌歷謹授人時
賀太皇太后表

天王一統為元載於正朔太皇萬年齊壽同御邦家日
月重明乾坤更始中賀恭惟壽和聖福太皇太后陛下
道符烈祖功擁神孫乾德太平訓實承於昭憲元祐盛
際政共聽於宣仁海開更瑟之休實繫垂簾之盛臣叨
承侯服丕奉慈宸基正始之風已新美化播思齊之頌

永戴徽音

賀皇太后表

春秋以一為元歷開昌運闢睢之化正始本在慈宸正朔
更新國家胥慶中賀恭惟皇太后陛下有娥長發大如
思齊齊壽以奉太皇德惟子肖受福而于王母祐自天
申宜渙號以繫年示同文而更始臣猥乘一障丕戴三
宮當昌歷應休期已供侯服綏眉壽介繁祉益贊母徽
歷日謝皇帝表

乘龍御以紀年一元正始詔虎城而頒朔千里承休敬
授人時對揚王命中謝恭惟皇帝陛下明哲作則歷數
在躬欽若昊天熙春夏秋冬之績建用皇極協雨暘寒
燠之疇乃誕布於成書以昭垂於新治臣蕃宣有恪播
告惟恭錫厥庶民順中星而平秩佑于一德歌化日之
舒長

謝太皇太后表

歲正孟陬一元改紀朝臨長樂萬國頒正春朔會同神

人和洽中謝恭惟壽和聖福太皇太后陛下怡愉萬歲
擁佑一人肖德而有神孫光膺昌歷受福而于王母丕
輯希禧載頒協律之書式重垂簾之政臣欽承鳳紀誕
布伏藩聽墀行之猷誕敷和氣獻蟠桃之頌益贊壽眉
謝皇太后表

鳳歷頒春東朝介福虎城告朔北面承休歲定四時天
佑一德中謝共惟皇太后陛下思齊肅穆少廣怡愉訓
示塗山歷開禹子教行渭涘紀協周王春朔攸同乾坤

交泰臣承流下障奉令孟陬協和萬邦第贊定時之績
嚮用五福益陳曰壽之休

疏

壽崇節本州進功德疏

九龍吐水當摩耶產佛之辰萬歲呼嵩上大母延年之
請敬憑二氏仰贊千齡壽和聖福皇太后陛下恭願大
安大榮至愉至佚慶雲五色現南極之祥光壽域八荒
衍西池之長筭

鈐司進功德疏

三寶曰慈南極行太皇之福五兵不試西江陶聖化之
風仗仙釋之殊因贊宮闈之丕慶壽和聖福皇太后陛
下恭願位隆少廣筭等崑丘仰大慈尊誕節正同於盛
旦得無量壽長生永協於先天

乾會節本州進功德疏

聖瑞虹流開半千之休運官聯虎拜瞻尺五之清光靄
玉翠之祥氛裒縹緗黃之妙果皇帝陛下恭願駿聲克廣

龍德方中地久天長壽命行洪源之慶河清海晏皇圖
鞏磐石之安

鈐司進功德疏

天臨寶位夙開繞電之符地領玉鈐載慶呼嵩之祝謹
率兵戈之屬虔修道梵之緣皇帝陛下恭願玉燭四時
金湯萬里元龜大貝梯航來川岳之珍歸馬放牛旗蓋
壯東南之運

天瑞節本州進功德疏

飛龍在天大橫有兆流虹貫月景命維新演道梵之真
詮崇聖明之瑞節皇帝陛下恭願維天其右如日之升
五百歲而生已開昌歷億萬年其永益鞏皇圖

鈐司進功德疏

為天下君祥書帝武祝聖人壽歡動戎昭闡二氏之真
科崇千秋之誕節皇帝陛下恭願泰元有相長數申休
在辛歲曰重光方升如日以乾元正五位多歷斯年

大行皇帝升遐本州進功德疏

帝棄羣臣忍傳末命教宗二氏恭薦殊因慨極烏號戀
深蟻慕大行皇帝伏願游神極樂觀化太虛十四聖之
在天皇靈陟降億萬年之與子丕祚綿洪

鈐司進功德疏

出宮駕晚縞素興哀望闕臺孤緇黃嚴薦恭哀冥福適
相宸遊大行皇帝伏願性悟真如道超無極成慶而垂
萬世聿齊九廟之靈後天而彫三光長作百神之主

皇帝聖躬違和保安諸廟疏

天子萬壽詎期無妄之災臣人一心共徯有神之相惟
帝齡之悠久實神貺之扶持名山大川尚鑒蘋蘩之意
普天率土不勝葵藿之私

本州宮寺保安疏

皇極九五福合率土以傾心帝壽千萬年籲慈尊昊天而請

命皇帝陛下伏願寅畏享國清明在躬王受命無疆惟
休誕迎和氣天行健自强不息丕享脩齡

鈐司宮寺保安僧疏

惟聖宅尊共祝一人之慶以臣請命敬皈三寶之慈皇
帝陛下伏願歷數在躬神明其德九五福曰壽丕享康
寧億萬載齊天式臻永久

道疏

率土傾心均願聖人之壽籲天請命肅殫臣子之忱

同前

大行皇帝遺誥本州成服道疏

道揚末命忍聞晏駕之音瞻仰昊天上帝訴遺弓之慟修
崇冥果攀慕遐征大行皇帝伏願返于混元光我烈祖

洋洋而在上降鑒臣民剌剌以揚靈永綏宗社

僧疏

捧九天之遺誥帝馭何追皈三寶之真乘臣心欲割

鈴司成服道疏

昊穹降割悵宸馭之上賓率土興悲望帝庭而哀籲虔
資冥福適相仙遊大行皇帝伏願靈德昭回皇明陟降
衣冠雖邈會烈祖以在天宗廟如存朝百神而為主

僧疏

昊穹降割慟玉仗之上賓率土興哀望金仙而仰籲虔
資冥福適相仙游

本州成服滿散疏

制嚴易月痛君父之通喪望極乘雲薦

人神

天之勝

果露典

香跼踏釋經悲傷大行皇帝伏願堯性常存舜明不隔
成慶而垂萬世聿齊九廟之靈後天而彫三光長作百
神之主

鈐司成服滿散疏

捧易月之制書萬邦哀痛修升遐之冥果

三寶蓋明
字吳監觀喪

紀有嚴孝思罔極大行皇帝伏願羹牆不遠劒舄如生
帝鄉而乘白雲真游沖漠孫謀之注豐水遺澤深長

大行皇帝本州追嚴道場疏

惟新陟王悵皇靈之日遠演

大乘教
無上法

資勝果於天游悼

痛彌深薦嚴有俶大行皇帝伏願性超

清淨
沖素

德邁

圓通
希夷

生為帝沒為神豐功不泯高配天厚配地明德無疆

鈴司追嚴道場疏

皇靈沖舉莫追汗漫之游

淨業真如
真誥昭宣

式薦逍遙之果終

天哀痛率土慕思大行皇帝伏願陟降太虛超升無極
儼橋山之劍舄云云

申省狀

辭免新除秘書省正字狀

具位文某照會十月二十六日伏準省劄十月二日三
省同奉聖旨文天祥除秘書省正字者某猥以疎賤叨
被聖恩望闕瞻天莫知所措伏念某自叨親擢未歷外

庸以讀書學從政之方以奉祠為書考之日方竊山林之暇敢圖臺省之登負乘非宜循牆無任伏望公朝特賜敷奏令某滿足宮觀兩考日祇被新命其於出處得宜庶幾無負聖明拔擢之意所有省劄未敢祇受除寄本州軍資庫外須至申聞者

再狀

具位文某照會於去年十月二十六日伏準省劄十月二日三省同奉聖旨文某除秘書省正字者某伏念一

介庸賤叨竊非宜加以從仕以來未有庸歷輒具狀申
控乞候宮觀兩考滿日祇被新命十二月二十九日伏
準省劄十二月九日三省同奉聖旨不允某除已望闕
謝恩擇日前來供職外須至申聞者

辭免知寧國府狀

具位文某照會伏準尚書省劄子四月十七日二省同
奉聖旨文某差知寧國府替朱應元缺者起家超躡望
闕徊徨伏念某實無他腸粗有遠志昔年憂國冒當事

任之難數歲杜門寧悔身謀之拙屬明良之胥慶念岳
牧之疇庸曾謂栖遲遽叨選用惟是某省愆已至貶秩
猶新雖公論至久而愈明而丹書未謂之無過儻不量
於出處是自速於顛隳欲望公朝特賜敷奏收回成命
改昇叢祠使某得以讀書養親安身寡過他有驅馳之
日無非報效之年所有省劄已寄留吉州軍資庫未敢
祇受須至申聞者

文山集卷四